

**ICYEMEZO CYA KOMITE NDANGAMYITWARIRE YA RWANDA  
MEDIA COMMISSION KU KIREGO CYA GBC IREGA  
UMUNYAMAKURU NIYIBIZI DIDACE N'IGITANGAZAMAKURU  
FLASH TV**

**UREGA**

GBC (GABANYIRIZWA BUSINESS COMPANY)

**UREGWA**

NIYIBIZI Didace n'Igitangazamakuru FLASH TV

**IKIREGERWA**

Gutangaza inkuru zisebya GBC n'abayobozi bayo

**URWEGO RWAREGEWE:**

Rwanda Media Commission (RMC)

## I. UKO IKIBAZO GITEYE MURI MAKE

1. Tariki 27 Kanama 2019 RMC yakiriye ikirego cya GBC kivuga ko FLASH TV Rwanda official channel kuri youtube yakoze inkuru zibasebya ikangiza isura ya company no kuyiteza igihombo gikomeye.
2. GBC ivuga ko umunyamakuru NIYIBIZI Didace yabasanze aho bakorera bagirana ikiganiro aho yababajije ku kibazo cy'imishahara y'ibirarane company ifitiye abakozi; kuba hari bamwe mu bakozi b'abakobwa Umuyobozi yaba yarasabye gukorana imibonano mpuzabitsina kugirango abahembe. Ikiganiro cyanyujijwe kuri Flash TV na Radio Flash nta kibazo bakigizeho, ariko nyuma y'umunsi umwe inkuru itambutse kuri TV na Radio Flash, batunguwe n'ibiganiro bacishije ku rubuga rwa youtube Flash TV Rwanda official channel bisebya company n'abayobozi bayo kandi batarigeze bababaza ibibavugwaho. Abarega bakomeje bavuga mu kirego cyabo ko bagiye kuri Flash kubaza impamvu y'ibyo batangaje kandi batabifitiye gihamya, Chief editor witwa Twahirwa Alphonse arabyemera anabisabira imbabazi, anavuga ko bagiye kubisiba ariko kugeza n'ubu biracyahari. GBC yagaragaje inkuru eshanu (5) zatangajwe kuri youtube channel ya Flash TV.

Izo nkuru zifite imitwe ikurikira:

- a. DG yanze kumpemba ngo keretse turyamanye;
- b. Boss yansabye ko turarana ijoro, agahinda k'umukobwa wanze kwishyurwa;
- c. Boss yansabye ituru ngo abone kumpemba. Yatanze ubuhamya mu kiniga cyinshi;
- d. Byose byagiye hanze. Ntawe baryamana ngo amuhembe. Asambanya hafi buri mukozi/ /Byose Sam yabihakanye;
- e. Barashaka kumparabika, Rukundo ushinjwa ruswa y'igitsina.

Ikirego gisaba ko ubuyobozi bw'ikinyamakuru bwakwandika inkuru ivuguruza ibyo batangaje; gutanga indishyi y'akababaro ihwanye n'amafaranga y'Urwanda angana na miliyoni enye(4,000,000 Frw) ku bayobozi bavuzwe mu nkuru ikinyamakuru kitabifitiye gihamya no kwishyura igihombo kingana n'amafaranga y'Urwanda angana na miliyoni eshatu na Magana abiri na mirongo itandatu(3,260,000 Frw) company yagize nyuma y'inkuru yaciye kuri youtube channel ya Flash TV.

Rwanda Media Commission imaze kwakira ikirego, yagennye Komite Ndagamyitwarire igizwe n'Abakomiseri batatu aribo: Komiseri Rev. Past. UWIMANA Jean Pierre, Komiseri UWINEZA Liliane(Perezida) na Komiseri KAGIRE Edmund ngo basuzume ikirego maze banafate umwanzuro.

